



REPUBLIKA E SHQIPËRISË
AUTORITETI I KONKURRENCËS
KOMISIONI I KONKURRENCËS

Nr. 869/ prot.

Tiranë, më 26.11.2025

14

VENDIM

Nr. 1232, Datë 26 . 11 . 2025

“MBI AUTORIZIMIN E PËRQENDRIMIT TË REALIZUAR NËPËRMJET PËRFTIMIT TË KONTROLLIT TË SHOQËRISË DIAL-ALB SHPK NGA SHOQËRIA EVITA SHPK”

Komisioni i Konkurrencës me pjesëmarrjen e:

Z.	Denar BIBA	Kryetar
Znj.	Leida MATJA	Zv/Kryetar
Znj.	Rezana KONOMI	Anëtar
Z.	Durim KRAJA	Anëtar
Znj.	Fatjola DELIJA	Anëtar

Në mbledhjen e tij të datës 26.11. 2025, shqyrtoi çështjen me:

Objekti: Autorizimi i përqendrimit të realizuar nëpërmjet përfutimit të kontrollit të shoqërisë DIAL-ALB SHPK nga shoqëria Evita SHPK.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit”, Udhëzimi “Mbi kontrollin e përqendrimeve ndërmjet ndërmarrjeve” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm, si dhe raportit të Drejtorisë së Analizës dhe Metodologjisë së Tregjeve “Rasti i përfutimit të kontrollit të DIAL-ALB SHPK nga shoqëria Evita SHPK”,

VËREN SE :

I. Palët në transaksion dhe procedura

1. Pranë Autoritetit të Konkurrencës është njoftuar transaksioni i përfutimit të kontrollit të shoqërisë DIAL-ALB SHPK nga shoqëria Evita SHPK.

2. Referuar dokumentit “Kontratë për shitjen e kuotës”, nënshkruar më datë 09 shtator 2025, palët në marrëveshje janë:
3. **Blerësi: Evita SHPK**, shoqëri me përgjegjësi të kufizuar, e cila operon në tregun e import-eksport dhe tregtim me shumicë dhe pakicë të produkteve farmaceutike, kozmetike, bimëve medicinale, instrumenteve dhe pajisjeve shëndetësore dhe medicinale, sanitare, shtesa ushqimore dhe dietike. Import, eksport, tregtim me shumicë, montim dhe riparim i aparaturave dhe pajisjeve mjekësore, impianteve dhe aksesoreve të tyre etj.
4. Shoqëria Evita SHPK zotërohet nga Ortaku z.Ertel Kërçuku në masën 27.50% të kapitalit dhe nga shoqëria Arimo B.V në masën 72,50%.
5. Shoqëria Evita zotëron kuota dhe ka kontroll të përbashkët në shoqëritë PHARMA ONE SHPK (33.33 % të kapitalit); Skopster Doo Skopje, me Maqedonine e Veriut (62.5 % të kapitalit) dhe Biohit MDS SHPK në Kosovë (60% të kuotave të shoqërisë). Gjithashtu, shoqëria Arimo B.V. zotëron kuota në shoqëritë Farmacom SHPK (63 % të kapitalit) dhe Equos Resort (85 % të kapitalit).
6. **Pala shitëse: Znj. Alba Rista**, shtetase shqiptare, e cila para transaksionit zotëronte 100% të kapitalit themeltar të shoqërisë target DIAL-ALB SHPK.
7. **Shoqëria Target: DIAL-ALB SHPK**, shoqëri me përgjegjësi të kufizuar, e cila ka objekt aktiviteti: import-eksport të produkteve farmaceutike, kozmetike, bimëve medicinale, instrumenteve dhe pajisjeve shëndetësore dhe medicinale, sanitare, shtesa ushqimore dhe dietike. Import, eksport, tregtimi me shumicë, montim dhe riparim i aparaturave dhe pajisjeve mjekësore, implanteve si dhe aksesoreve të tyre edhe gjeneratorëve me Rreze X, instalimi dhe mirëmbajtjen e të gjithë pajisjeve të cituara me sipër; Import - eksport, tregti me shumicë të materialeve, pajisjeve dhe aparaturave dentare etj. Solucione dhe materiale pastrimi etj. Investime dhe shërbime në fushën e mjekësisë dhe shëndetit, ngritja dhe menaxhimi i klinikave private. Prodhimi, shpërndarja dhe shitja e gazrave industrial, mjekësor dhe speciale si dhe të pajisjeve që lidhen me to. Ofrimin e shërbimeve të inxhinierisë (Engineering) si dhe tregtimin e materialeve dhe ofrimin e shërbimeve që kanë të bëjnë me pajisjet e prerjes dhe saldimit dhe me teknologjinë e veshjes apo shkrirjes si edhe kryerjen e transportit të mallrave për nevojat e veta dhe të të tretëve në Shqipëri dhe jashtë saj.

II. Transaksioni

8. Më datë 02.09.2025, mes palëve: znj Alba Rista, në cilësinë e shitësit, z. Albano Rista, në cilësinë e bashkëshortit pëlqimdhënës, dhe shoqërisë Evita SHPK, në cilësinë e blerësit, është nënshkruar dokumenti “Kontrate për shitjen e kuotës”.
9. Objekti i kontratës është përcaktimi i kushteve, modaliteteve dhe pasojave të transaksionit mbi shitjen e Kuotës së zotëruar nga shitësi, e cila përfaqëson 80% të kapitalit bazë të shoqërisë DIAL-ALB SHPK, në favor të blerësit, kundrejt 60,000 euro, sipas kushteve, afateve dhe modaliteteve të përcaktuara në këtë kontratë.

10. Në përfundim të marrëveshjes, shoqëria Evita SHPK do të jetë zotërues i një kuotë që përfaqëson 80% të kapitalit të shoqërisë dhe referuar draft/Statutit të shoqërisë target, konstatohet se shoqëria pritet të kontrollohet nga shoqëria Evita SHPK.
11. Palët kanë parashikuar në nenin 6 të kontratës, se kontrata do të prodhojë efekte juridike pas marrjen e miratimit me vendim përfundimtar nga Autoriteti i Konkurrencës dhe në rast refuzimi, kontrata do të konsiderohet e pavlefshme.
12. Transaksioni i njoftuar konsiston në përfitim të kontrollit të shoqërisë DIAL-ALB SHPK nga shoqëria Evita SHPK, transaksion, i cili është në përputhje me nenin 10 dhe 12 të ligjit nr. 9121, datë 28.07.2003, “Për mbrojtjen e konkurrencës” dhe si i tillë është objekt autorizimi nga Komisioni i Konkurrencës.

III. Analiza e konkurrencës

13. Pala njoftuese ka deklaruar në dokumentacionin e dosjes, se shoqëria target operon në tregun e shitjes dhe mirëmbajtjes së pajisjeve mjekësore.
14. Mbështetur në të dhënat e administruara në procedura të mëparshme të kontrollit të përqendrime¹, është evidentuar se DIAL-ALB SHPK ka realizuar vetëm import të materiale dhe pajisjeve mjekësore gjatë vitit 2023-2024. Në të dhënat e administruara nga tatimet për vitet 2023-2024 rezulton se shoqëria është klasifikuar si shitës më shumicë të produkteve farmaceutikë
15. Nga sa reklamohet në rrjetet sociale, konstatohet se shoqëria deklarohet si përfaqësues i markës Abbot, ZARYS për materialet e konsumit mjekësor.
16. Referuar nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, si edhe Udhëzimit nr. 76, datë 07.04.2008 “Për përcaktimin e tregut përkatës”, treg përkatës do të konsiderohet tregu i shitjes dhe mirëmbajtjes së pajisjeve mjekësore dhe laboratorike dhe treg përkatës gjeografik do të konsiderohet territori i Republikës së Shqipërisë.
17. Tregu i tregtimit të pajisjeve mjekësore dhe laboratorike funksionon në zbatim të ligjit nr. 89/2014, datë 17.07.2014 “Për pajisjet mjekësore”, i ndryshuar, i cili përcakton parimet kryesore për rregullimin, organizimin dhe funksionimin e procesit të regjistrimit, mënyrën e shpërndarjes, vlerësimin e konformitetit, inspektimin dhe mbikëqyrjen e pajisjeve mjekësore.
18. Shitja e tyre kryhet nga tregtuesit me shumicë, të cilët janë persona juridikë të licencuar për këtë veprimtari, sipas legjislacionit në fuqi për licencat, autorizimet dhe lejet. Të gjitha pajisjet mjekësore që vendosen në treg në Republikën e Shqipërisë, duhet të regjistrohen në Regjistrin Kombëtar të Pajisjeve Mjekësore që mbahet nga Agjencia Kombëtare e Barnave dhe Pajisjeve Mjekësore.

¹ Rasti Nr. 69/2025 – XVI / Përfitim kontrolli, Klodian Allajbeu – Med Lab SHPK; VKK nr. 1180, datë 14.05.2025, “Mbi autorizimin e përqendrimit të realizuar nëpërmjet përfitimit të kontrollit të shoqërisë Med Lab SHPK nga Z. Klodian Allajbeu”

19. Nga verifikimi i bazës së të dhënave të Agjencisë Kombëtare të Barnave dhe Pajisjeve Mjekësore për pajisjet mjekësorë², shoqëria rezulton të ketë regjistruar rreth 70 artikuj në regjistrin e pajisjeve mjekësore dhe nga një verifikim i listës, konstatohet se pjesa më e madhe e pajisjeve janë njëpërdorimshme.
20. Nga të dhënat e administruara nga Drejtoria e Përgjithshme e Doganave u konstatua se shoqëritë DIAL-AL SHPK dhe EVITA SHPK janë importues në kodin doganor që përfshin instrumentet dhe pajisjet e përdorur në mjekësi, kirurgji, shkencat dentare ose veterinare, aparatet shintigrafike, aparatura të tjera elektro - mjekësore dhe instrumenta për testimin e shikimit: Aparatet elektro-diagnostikues (përfshirë aparatet për ekzaminim eksplorim funksional apo për kontroll të parametrave fiziologjike), aparatet scaner, aparate me rreze ultraviolet, instrumente dhe pajisje të përdorura në shkencat dentare, endoskopët, pajisjet e dializës, etj.
21. Mbështetur në vlerën e importeve të realizuar për vitin 2023-2024, konstatohet se palët pjesëmarrëse në marrëveshje, Evita SHPK ka realizuar 2.6% të importit të pajisjeve mjekësore me një trend në ulje krahasuar me vitin 2023, ndërkohë që targeti, ndërmarrja DIAL-ALB SHPK, ka një vlerë të vogël, duke realizuar rreth 0.4% të importeve (me trend rënës nga viti 2023). Sipas vlerësimeve të brendshëm të realizuar nga pala njoftuese, pjesa e tregut e targetit, sipas shitjeve të realizuar, është shumë e vogël.
22. Transaksioni i përfutimit të kontrollit të shoqërisë DIAL-ALB SHPK nga shoqëria Evita SHPK, krijon një mbivendosje horizontale në tregun e shitjes dhe mirëmbajtjes së pajisjeve mjekësore.
23. Bazuar në Udhëzimin “Për vlerësimin e përqendrimeve horizontale”, përqendrimet horizontale ndodhin në rastet kur ndërmarrjet pjesëmarrëse janë konkurrentë aktualë ose potencialë në të njëjtin treg përkatës. Për sa më sipër, transaksioni i njoftuar përbën një përqendrim horizontal në tregun e tregimit të pajisjeve mjekësore dhe laboratorike.
24. Nga vlerësimi i strukturës së tregut përkatës të produktit konstatohet se palët pjesëmarrëse në transaksion, shoqëria Evita SHPK dhe DIAL-ALB SHPK, kanë realizuar importe në vlera të ulta dhe për më tepër, në tregun e shitjes së materialeve mjekësore dhe laboratorike, shoqëria target zotëron një pjesë shumë të vogël në treg.
25. Për sa më sipër, përfutimi i kontrollit të vetëm të shoqërisë DIAL-ALB SHPK nga Evita SHPK nuk pritet të ndikojë në krijimin apo forcimin e pozitës dominuese të palëve pjesëmarrëse në transaksion, në tregun përkatës të produktit dhe nuk shfaq shenja të kufizimit të konkurrencës në treg ose në një pjesë të tij në veçanti.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”,


VENDOSI:

² <https://akbpm.gov.al/>

1. Të autorizojë përqendrimin e propozuar nëpërmjet përfutimit të kontrollit të shoqërisë DIAL-ALB SHPK nga Evita SHPK.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS

Leida MATJA () Zv/Kryetar	Rezana KONOMI () Anëtar	Durim KRAJA () Anëtar	Fatjola DELIJA () Anëtar
--	--	---	---

Denar BIBA
()
Kryetar

